



REPUBLIKA E SHQIPËRISË
ENTI RREGULLATOR I ENERGJISË
BORDI

VENDIM

Nr. 24, Datë 30.01.2026

MBI

**VLERËSIMIN E RAPORTIT VJETOR TË ZYRTARIT TË PËRPUTHSHMËRISË SË
SHOQËRISË “ALBGAS” SH.A. PËR ZBATIMIN E PROGRAMIT TË
PËRPUTHSHMËRISË PËR VITIN 2024**

Në mbështetje të nenit 16 të ligjit nr. 43/2015, “Për sektorin e energjisë elektrike”, të ndryshuar; neneve 16 dhe 47, të ligjit nr. 102/2015 “Për sektorin e gazit natyror”, të ndryshuar; vendimit të bordit të Entit Rregullator të Energjisë (ERE) nr. 171, datë 16.08.2021, “Për miratimin e Programit të Përputhshmërisë së Operatorit të Sistemit të Transmetimit për Gazin Natyror, “ALBGAS” sh.a.”, i ndryshuar me vendimin nr. 345, datë 21.12.2022; vendimit të bordit të ERE-s nr. 355, datë 28.12.2022, i ndryshuar, “Mbi miratimin paraprak të Zyrtarit të Përputhshmërisë së Albgas sh.a.” i ndryshuar me vendimin nr. 133, datë 07.04.2023; si dhe nenit 15 të Rregullores për organizimin, funksionimin dhe procedurat e ERE-s, miratuar me vendimin e bordit të ERE-s nr. 96, datë 17.06.2016; Bordi i ERE-s, në mbledhjen e tij të datës 30.01.2026, mbasi shqyrtoi relacionin e përgatitur nga Drejtoria e Pajtuësshmërisë dhe Vlerësimit të Impaktit Rregullator dhe Drejtoria e Gazit Natyror, me nr. 321 prot., datë 23.01.2026, “Mbi vlerësimin e Raportit Vjetor të Përputhshmërisë së operatorit të gazit natyror ‘Albgaz’ sh.a. për vitin 2024”,

Konstatoi se:

- Në zbatim të ligjit nr. 102/2015, “Për sektorin e gazit natyror”, të ndryshuar dhe të Programit të Përputhshmërisë të miratuar nga bordi i ERE-s, përputhshmëria me programin monitorohet në mënyrë të pavarur nga Zyrtari i Përputhshmërisë, i cili përgatit dhe depoziton pranë ERE raportin vjetor mbi masat e marra për zbatimin e Programit, brenda afateve të përcaktuara. ERE, në ushtrim të kompetencave të saj mbikëqyrëse dhe vlerësuese, shqyrton raportimin e paraqitur nga Zyrtari i Përputhshmërisë, me qëllim garantimin e pavarësisë funksionale/menaxheriale, transparencës dhe trajtimit jo-diskriminues në sektorin e gazit natyror.

1. Dorëzimi dhe shqyrtimi i raportit për vitin 2024

- Zyrtari i Përputhshmërisë i “Albgaz” sh.a., me shkresën nr. 1141/2 prot., datë 25.04.2025, ka depozituar pranë ERE Raportin Vjetor të Përputhshmërisë së “Albgaz” sh.a. për vitin 2024.
- Pas analizës së kryer, ERE, me shkresën nr. 1141/5 prot., datë 01.08.2025, i ka kërkuar Zyrtarit plotësim me informacion dhe dokumentacion shtesë mbi përmbajtjen e raportit, lidhur me: (i) respektimin e afateve ligjore për dorëzimin e raportit; (ii) pasaktësitë në përmbajtjen e raportit; (iii) mungesat e dokumentacionit që dëshmojnë përfshirjen e Zyrtarit në proceset e ndarjes së pronësisë dhe pavarësisë funksionale; (iv) funksionalitetin dhe transparencën e faqes zyrtare

të shoqërisë; (v) masat për garantimin e konfidencialitetit të informacionit; (vi) përfshirjen e Zyrtarit në planifikimin afatgjatë të rrjetit; (vii) projektet e gazifikimit; si dhe (viii) raportimin mbi statusin e rekomandimeve të mëparshme.

- Në vijim, Zyrtari, me shkresën nr. 1141/6 prot., datë 16.08.2025, ka paraqitur informacion plotësues, i cili nuk ka shteruar plotësisht kërkesat e ERE-s, për këtë arsye në përputhje me kuadrin ligjor dhe aktet e brendshme procedurale, ERE ka zhvilluar seancë dëgjimore me Zyrtarin dhe është dakordësuar ridërgimi i raportit përfundimtar me plotësimet përkatëse.
- Në përfundim, Zyrtari, me shkresën nr. 1141/14 prot., datë 20.10.2025, ka dorëzuar në ERE Raportin Vjetor përfundimtar të Përputhshmërisë së “Albgaz” sh.a. për vitin 2024.

2. Vlerësimi i përmbajtjes së raportit

- Raporti vjetor përbëhet nga: (i) informacion i përgjithshëm mbi zbatimin e Programit; (ii) rekomandimet e Zyrtarit; (iii) konkluzione.
- ERE, në vlerësimin e tij, ka marrë në konsideratë informacionin që lidhet me përmbushjen e kërkesave të Programit të Përputhshmërisë, duke u fokusuar në elementet dhe kriteret që lidhen drejtpërdrejt me këto detyrime. Çdo informacion tjetër i trajtuar nga Zyrtari, që nuk është pjesë e kërkesave të Programit, nuk është përfshirë dhe nuk përbën qëllim të vlerësimit.
- Bordi i ERE-s me vendimin nr. 179, datë 08.11.2017, “Mbi certifikimin e shoqërisë “Operatori i Kombinuar i Gazit Natyror” Albgaz sh.a.”, ka përcaktuar, ndër të tjera, kërkesa për: pavarësinë e audituesit financiar si dhe bashkëpunimin ndër-institucional për realizimin e ndryshimeve në kuadrin ligjor (neni 11 dhe neni 46, pika 10, të ligjit nr. 102/2015) dhe transferimin e kompetencave tek Ministria e Ekonomisë dhe Financave.
- Në lidhje me ndarjen ligjore të shoqërisë “Albgaz” sh.a., në raportin e Zyrtarit nuk është trajtuar në mënyrë eksplicite struktura e pronësisë dhe raporti me autoritetin që ushtron të drejtat e aksionarit, megjithëse kjo çështje rezultoi e përcaktuar në aktet e krijimit dhe organizimit të shoqërisë “Albgaz” sh.a., sipas VKM nr. 848/2016 dhe akteve përkatëse të organizimit shtetëror. Për rrjedhojë, kjo nuk përbën mungesë të ndarjes ligjore, por mungesë referimi të plotë në raportim.
- Nga vlerësimi i kryer rezultojnë çështje që kërkojnë përmirësim dhe plotësim në raportimet pasardhëse, veçanërisht lidhur me: (i) raportimin e dokumentuar mbi pavarësinë e audituesit financiar dhe përmbushjen e kushteve të certifikimit; (ii) pasqyrimin e ndryshimeve në strukturën organizative dhe provat miratuese përkatëse; (iii) identifikimin dhe dokumentimin e ndarjes ligjore/ funksionale dhe pavarësisë menaxheriale; (iv) monitorimin e detyrimeve për publikim/transparencë (përfshirë aksesueshmërinë e dokumenteve dhe vendimeve përkatëse); (v) masat konkrete për konfidencialitetin e informacionit; (vi) metodologjinë e monitorimit dhe evidencat e pjesëmarrjes/njoftimeve në mbledhje; (vii) respektimin e afateve të raportimit sipas Programit; (viii) pasqyrimin e statusit të rekomandimeve dhe detyrave specifike të lëna nga ERE.

3. Nevoja për përmirësim dhe rekomandime për periudhën pasardhëse

- Bazuar në vlerësimin e mësipërm, ERE çmon të nevojshme që Zyrtari i Përputhshmërisë dhe “Albgaz” sh.a. të marrin masa për adresimin e rekomandimeve/detyrimeve të evidentuara, sipas Aneksëve 1 dhe 2 bashkëlidhur këtij vendimi.

Për gjithë sa më sipër, bordi i ERE-s,

Vendosi:

1. Miratimin e pjesshëm të Raportit Vjetor të Zyrtarit të Përputhshmërisë së shoqërisë “Albgaz” sh.a., për vitin 2024, në kuptim të vlerësimeve/konstatimeve të ERE-s të pasqyruara në këtë vendim.
2. Zyrtari i Përputhshmërisë dhe shoqëria “ALBGAS” sh.a. të marrin masat për zbatimin e rekomandimeve sipas Aneksit 1 dhe Aneksit 2 bashkëlidhur këtij vendimi.
3. Drejtoria e Pajtueshmërisë dhe Impaktit Rregullator, të njoftojë Ministrinë e Infrastrukturës dhe Energjisë, të njoftojë shoqërinë “Albgaz” sh.a., Zyrtarin e Përputhshmërisë, Sekretariatën e Komunitetit të Energjisë, për vendimin e bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes dijeni, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI

Petrit AHMETI

Aneksi 1 - Rekomandime për Zyrтарin e Përputhshmërisë në vijim të vlerësimit të Raportit Vjetor të Përputhshmërisë për vitin 2024

1. Statusi Ligjor dhe Struktura e Albgaz sh.a,

- a) Zyrtari Përputhshmërisë të monitorojë zbatimin e kërkesës për pavarësinë e audituesit financiar, në përputhje me pikën 5.1 të vendimit të bordit të ERE-s nr. 179, datë 08.11.2017, “Mbi certifikimin e shoqërisë “Operatori i Kombinuar i Gazit Natyror” ALBGAS sh.a.”, dhe të pasqyrojë në raportimet në vijim nivelin e përmbushjes së kësaj kërkesë, duke monitoruar dhe raportuar mbi respektimin nga operatori që të mos emërojë auditues financiarë që auditojnë ose kryejnë detyra për ndërmarrje që ushtrojnë veprimtari të prodhimit ose furnizimit të gazit natyror.
- b) Zyrtari i Përputhshmërisë të vijojë të raportojë në raportimet pasardhëse për çdo ndryshim të ndodhur mbi strukturën organizative të operatorit “Albgaz” sh.a. Raportimi të bëhet duke përfshirë dhe deklarimin mbi aktet e miratimit të kësaj strukture të re në përputhje me detyrimet e përcaktuara në pikën 16.4 të Programit të Përputhshmërisë. Në vijim Zyrtari duhet të pasqyrojë çdo ndryshim në nivelet drejtuese apo ekzekutive gjatë periudhës së monitorimit, me qëllim rritjen e transparencës dhe mundësimin e një vlerësimi të plotë mbi strukturën organizative të shoqërisë.

2. Ndarja dhe Pavarësia e “Albgaz” sh.a

Ndarja funksionale dhe Pavarësia drejtuese funksionale dhe vendimmarrëse: Në raportin pasardhës, Zyrtari i Përputhshmërisë duhet të pasqyrojë në mënyrë të qartë, të mbështetur në evidenca dhe informacion të verifikueshëm pranë operatorit, veprimet që lidhen me sigurimin e pavarësisë funksionale dhe menaxheriale të shoqërisë, duke shmangur raportimin vetëm në formë deklarative. Raportimi duhet të demonstrojë përputhshmërinë me detyrimet e përcaktuara në Programin e Përputhshmërisë, nëpërmjet përshkrimit të masave të ndërmarra, mekanizmave të kontrollit dhe mënyrës së zbatimit të tyre gjatë periudhës së monitorimit.

3. Përfshirja e sjelljes diskriminuese

Aksesi në sistemin e transmetimit: Në kuadër të monitorimit të përmbushjes së detyrimeve të përcaktuara në pikën 27 të Programit të Përputhshmërisë, Zyrtari i Përputhshmërisë duhet të kryejë verifikime periodike mbi publikimin, përditësimin dhe aksesueshmërinë në faqen zyrtare të ALBGAS sh.a. të tarifave të transmetimit dhe vendimmarrjeve përkatëse të Enti Rregullator i Energjisë. Këto verifikime duhet të pasqyrohen në raportimet pranë ERE në mënyrë të detajuar, duke evidentuar elementet e verifikuara, kohën e kryerjes së verifikimeve, konstatimet e rezultuara (përfshirë raste të mungesës së publikimit, vonesave apo pasaktësive), si dhe masat e marra ose të rekomanduara për korrigjimin e tyre. Raportimi nuk duhet të kufizohet në deklarime të përgjithshme të përputhshmërisë, por duhet të mbështetet në evidenca dhe konstatime konkrete që rrjedhin nga veprimtaria monitoruese e ushtruar nga Zyrtari.

4. Politika e informacionit të “Albgaz” sh.a.

- a) Sigurimi i informacionit: Zyrtari të monitorojë dhe të raportojë që publikimi dhe aksesimi i këtij informacioni është në përputhje me përcaktimet e pikës 37 të programit.
- b) Zyrtari i Përputhshmërisë duhet, në kuadër të funksionit të tij monitorues, të verifikojë dhe të raportojë në raportimet pasardhëse mbi ekzistencën dhe zbatimin nga Operatori të masave që

lidhen me ruajtjen e konfidencialitetit të informacionit, përfshirë nëse në kontratat e punonjësve parashikohen dispozita për ruajtjen e informacionit konfidencial dhe pasoja financiare në rast të mosrespektimit të këtij detyrimi, në përputhje me pikën 50 të Programit të Përputhshmërisë.

- c) Zyrtari i Përputhshmërisë duhet të monitorojë dhe të raportojë mbi përmbushjen e detyrimeve të transparencës nga Operatori, duke verifikuar nëse informacioni i detyrueshëm sipas pikës 53 të Programit është i publikuar, i përditësuar dhe i aksesueshëm në faqen zyrtare.

5. Zbatimi i Programit

- a) Karakteri detyrues i programit: Raporti i Zyrtarit duhet të pasqyrojë në mënyrë të përmbledhur rekomandimet e dhëna gjatë periudhës së raportimit, si dhe çdo zhvillim që lidhet me licencimin dhe detyrimet rregullatore, me qëllim sigurimin e një pamjeje të qartë mbi përputhshmërinë dhe veprimtarinë e Operatorit.
- b) Monitorimi i zbatimit të programit: Zyrtari duhet të ushtrojë në mënyrë aktive të gjitha të drejtat dhe detyrimet e monitorimit që i ngarkohen nga legjislacioni në fuqi dhe Programi i Pajtushmërisë të cilat përfshijnë, ndër të tjera: pjesëmarrjen në mbledhjet e organeve drejtuese dhe strukturave përkatëse të Operatorit, kur trajtohen çështje që lidhen me Programin e Përputhshmërisë; verifikimin periodik të zbatimit të masave dhe detyrimeve të Programit në strukturat e Operatorit; mbledhjen dhe shqyrtimin e dokumentacionit përkatës lidhur me zbatimin e Programit; ndjekjen e publikimeve dhe transparencës së informacionit të detyrueshëm; dokumentimin e veprimtarive monitoruese dhe pasqyrimin e tyre në raportimet periodike dhe vjetore pranë ERE-s.
- c) Metoda e monitorimit të zbatimit të Programit të Përputhshmërisë: Zyrtari duhet të përforcojë mekanizmat e monitorimit të zbatimit të Programit, duke mos u kufizuar vetëm në shkëmbimin e korrespondencës shkresore, por duke ushtruar një monitorim aktiv, të vazhdueshëm dhe të dokumentuar.
- d) Raportimi dhe zbatimi programit: Zyrtari i Përputhshmërisë duhet të sigurojë respektimin e afateve të raportimit të përcaktuara në pikën 73 të Programit të Përputhshmërisë. Në rast se konstaton pamundësi objektive për respektimin e këtyre afateve, ai duhet të njoftojë paraprakisht ERE-n, duke paraqitur një arsyetim të dokumentuar dhe të argumentuar mbi shkaqet e vonësës, si dhe masat e marra për të shmangur përsëritjen e rasteve të tilla në raportimet pasardhëse.
- e) Zbatimi i Përputhshmërisë duhet të sigurojë që në raportet vjetore të përfshihet një pasqyrë e qartë mbi statusin e rekomandimeve të dhëna nga ERE në raportimin e mëparshëm, duke evidentuar nivelin e përmbushjes së tyre, masat e ndërmarra për zbatimin e rekomandimeve të papërfunduara dhe ecurinë e tyre gjatë periudhës së monitorimit.

Aneksi 2 - Rekomandime për shoqërinë “Albgaz” sh.a. në vijim të vlerësimit të Raportit Vjetor të Përputhshmërisë për vitin 2024

1. Statusi ligjor dhe struktura organizative

- a) Shoqëria “Albgaz” sh.a. duhet të informojë dhe të vërë në dispozicion të Zyrtarit të Përputhshmërisë dhe ERE-s dokumentacionin që dëshmon respektimin e kërkesës për pavarësinë e audituesit financiar, në përputhje me kushtet e vendosura në vendimin e certifikimit, përfshirë deklarimin se audituesi financiar nuk ushtron veprimtari auditimi apo shërbime për ndërmarrje që kryejnë veprimtari prodhimi ose furnizimi me gaz natyror.
- b) Shoqëria duhet të dokumentojë çdo ndryshim në strukturën organizative dhe në nivelet drejtuese apo ekzekutive, si dhe të sigurojë akses të Zyrtarit të Përputhshmërisë në njohjen me aktet miratuese.

2. Ndarja dhe pavarësia e shoqërisë

Shoqëria “Albgaz” sh.a. duhet të vijojë të sigurojë ruajtjen e ndarjes ligjore dhe organizative të veprimtarisë së transmetimit të gazit natyror si subjekt juridik i veçantë, në përputhje me aktet themeluese dhe Programin e Përputhshmërisë, si dhe të dokumentojë në raportimet pasardhëse çdo element që lidhet me strukturën e pronësisë dhe ushtrimin e të drejtave të aksionarit nga autoriteti publik përkatës.

3. Përjashtimi i sjelljes diskriminuese

Shoqëria duhet të sigurojë publikimin në faqen zyrtare të internetit të vendimeve të ERE-s, tarifave dhe akteve rregullatore përkatëse, si dhe të garantojë që dokumentet që janë të detyrueshme për t'u publikuar të jenë të aksesueshme dhe të përditësuara.

4. Politika e informacionit

- a) Shoqëria duhet të zbatojë detyrimet për publikimin dhe aksesin në informacion në përputhje me kërkesat e Programit të Përputhshmërisë, duke garantuar që informacioni i detyrueshëm për përdoruesit e sistemit dhe palët e interesuara të jetë i publikuar, i përditësuar dhe lehtësisht i aksesueshëm në faqen zyrtare, përfshirë listën e shërbimeve, kushtet dhe procedurat për përfitimin e tyre (pika 53).
- b) Shoqëria “Albgaz” sh.a. duhet të sigurojë që në kontratat e punonjësve të përfshihen dispozita mbi ruajtjen e informacionit konfidencial, si dhe pasoja financiare në rast të mosrespektimit të këtij detyrimi, në përputhje me pikën 50 të Programit të Përputhshmërisë. Shoqëria duhet të sigurojë publikimin e informacionit të detyrueshëm për përdoruesit e sistemit dhe palët e interesuara, përfshirë listën e shërbimeve, kushtet dhe procedurat për përfitimin e tyre.

5. Zbatimi i Programit të Përputhshmërisë

- a) Shoqëria duhet të sigurojë zbatimin e karakterit detyrues të Programit të Përputhshmërisë në të gjitha strukturat dhe nivelet organizative.
- b) Shoqëria duhet të sigurojë njoftimin paraprak dhe në kohë të Zyrtarit të Përputhshmërisë për çdo mbledhje të organeve drejtuese ku trajtohen çështje që lidhen me zbatimin e Programit të Përputhshmërisë, duke i vënë në dispozicion rendin e ditës, materialet shoqëruese dhe vendimmarrjet përkatëse, si dhe duke dokumentuar këto njoftime dhe pjesëmarrjen e Zyrtarit për qëllime monitorimi.
- c) Shoqëria duhet të bashkëpunojë me Zyrtarin e Përputhshmërisë, duke i garantuar akses në dokumentacion, struktura dhe informacion të nevojshëm për monitorimin e zbatimit të Programit.